



12. aggusti 2011

UKA 2011/94

Inatsisartut Suleriaasianni § 33 tunngavigalugu aalajangiiffigisassatut siunnersuut imaattoq matumuuna saqqummiupparput:

Qaffasinnerusumik ilinniagaqartunut ilinniagaqarnermi taarsigassarsiat kiisalu ataasiartumik taarsigassarsiat aningaasartaasa qafanneqarnissaannik kiisalu ilinniagaqarnermi taarsigassarsiat ukiup affakkuutaartumik tunniunneqartartut qaamatikkuutaartunngortinneqarnissat pillugu Naalakkersuisut pisussaaffilerneqarnissaannik Inatsisartut aalajangiinissaannik siunnersuut.
(Inatsisartuni ilaasortat Knud Kristiansen aamma Siverth K. Heilmann, Atassut)

Tunngavilersuut:

2011-mi upernaakkut ataatsimiinnermi ilinniagaqartut piginnaatitaaffii pillugit aalajangiinissamik siunnersuut oqallisigineqangaatsiarpoq. Oqallinnermi tassani tamanit isumaqatigissutigineqartoq tassaavoq Kalaallit Nunaata siunissaani ilinniagaqarsimanissaq pingaaruteqarnerpaasoq. Taamaattumik ilinniagaqartut inuuniarnerminni qanoq atugaqarnerat pingaaruteqarpoq. Aammattaaq ataatsimiinnermi erserpoq ilinniagarnerisutit pillugit Inatsisartut peqqussutaata nr.5-ip 14. november 2004-meersup nutarterneqarnissaannik siunnersuummik Naalakkersuisut saqqummiussissamaartut. Nutarterinerup aallaavigissavai missuinerup 2010-mi upernaakkut ataatsimiinnermi imm. 156-imut atatillugu Inatsisartut aalajangiinerat tunngavigalugu Naalakkersuisut misissuisitsineranni angusat.

Naalakkersuisuttaaq 2010-mi upernaakkut ataatsimiinnermi erseqqissarpaat 2011-mi ukiakkut ataatsimiinnermiussagunartoq ilinniagaqartunut tapissutaasartut taarsigassarsiallu annertussusilernerit Aningaasat Inatsisaatigut nutarteriffigineqarumaartut. Uagut Atassummiit ilinniagartitsinermit taarsigassarsiat ataasia-tumillu taarsigassarsiat qafanneqarnissaannik siunnersuummik matumuuna siunnersuuteqarpugut.

Ullumikkut piffissaq ilinniarfiusoq tamakkerlugu ukiup affaanut 6000 kr-nik taarsigassarsisitsisoqartarpoq ilinniarnerrullu ingerlanerani ataasiartumik 10.000 kr.-nik taarsigassarsisitsisoqartarluni. Uagut Atassummi isumaqarpugut taarsigassarsiat taakku s.i. Danmarkimi ilinniagartut ilinniaqataasa atugassarisaannut sanilliullugit appasippallaartut. Taamaattumik isumaqarpugut ilinniagaqartut amerlanerusunik taarsigassarsinnaasariaqartut, s.i. ilinnigaqartut inigisamik attartornerminni akiliutigisinnaasaannik. Danmarkimi aamma Kalaallit Nunaanni inissiamik ilinniagaqartunut naatsorsuussanik pissarsiniarneq ajornakusoortuuvoq. Danmarkimi imaakkajuppoq ilinniagaqartut ukiuni marlussunni ilinniarnermikkut ingerlatsereersut ilinniagaqartunut inissamik tunineqartarlutik. Piffissami ilinniagaqartup inissaminik pissarsiffigisassaata tungaanut ilinniagaqartoq aningaasartuuterpassuaqarsinnaasarpoq, tamatumani lu qaffasinnerusunik taarsigassarsinnatitanerup iluaqusissagaluarpaa.

Nassuerutigisariaqarpoq ilinniagaqarnerup saniatigut suliffissarsiniarneq ajornarnerujussuanngorsimammat, tamannalu aningaasaqarniarnikkut ajornartorsiuteqarnermik pissuteqarsorinarpoq. Ilinniagartunut amerlasuunut suut tamarmik aningaasaqarniarnikkut ataqatigissinniarnerat ajornartorsiornarsinnaasarpoq, tamakkulu akiorniassagutsigit ilinniagaqarnermi taarsigassarsiat amerlassusii eqarsaatigeqittariaqarparput.

Ilinniagaqarluarsimasunik atorfissaqartitsinerput annertuvoq, ilinniagaqartullu Inatsisartunit tapersorsorneqarnertik malugissappassuk ilinniagaqarnermi taarsigassarsiat amerlassusilerneqarnerat qanoq iliuuseqarfigisariaqarparput. Inuusuttut ilinniarluarsimasut pingaarutilerujussuupput, taamaattumillu taakku aningaasatigut atugarisamikkut pitsaasumik atugaqarnissaat qulakkeerneqartariaqarpoq.

Siunnersuutigaarput taarsigassarsiat qaammatikkuutaartumik tunniunneqartalissasut taamaalillutik taar-sigassarsiat qaammatikkuutaartumik aningaasartuutitut matusissutaasinnaalersillugit. Paasisimavarput ilinniagaqartunut tapissuteqartarneq pillugu Inatsisartut Pequssutaat nr. 5 14. november 2004-meersoq Naalakkersuisut nutarterniaraat, taamaalilluni atuakkanik pisisarneq tapiiffigineqarsinnaalersillugu. Taa-maattumik isumaqarpugut ilinniagaqartunut qaammatikkuutaartumik taarsigassarsisitsisarnikkut ilinnia-gartut aningaasatigut atugassaqarnerat pitsanngortinneqarsinnaasoq.

Tamanna aningaasaqarnermut allaffissornermullu qanoq sunniuteqassava?

Tamanna aningaasaqarnermut allaffissornermullu sunniuteqassaaq, tassami taarsigaasarsiaritinneqartartut qaffanneqarnissaat ilimagisariaqarmat. Ilinniagarnermi taarsigassarsiniarnissaq ilinniagaqartut namminneq isumagissavaat, taamaattumillu ilinniagaqartut qanoq amerlatigisut taarsigassarserusunnerat aningaasartuutit amerlassusissaannut aalajangiisuujumaarpoq.

Aningaasartuutissalli pisortanut aningaasatigut sunniutigisassaannut tunngatillugu aallaavigineqarsinnaapput 2011-mi aningaasat inatsisaanni imm. 40.20.03 Taarsigassarsiaritit aningaaserivinnillu taarsigassarsianit taarsikkat-ni 2012-imi ingerlatanut kisitsisajumaartut ilimagisat.

Taakkunani takuneqarsinnaavoq ilinniagaqarnermi taarsigassarsiat ukiup affaanut 500 kr-nik qaffanneqarpata pisortat ukiumut aningaasartuutaat 275.000 kr.-nik qaffakkumaartut, aammalu ilinniagaqarnermi taarsigassarsiat ukiup affaanut 1.000 kr.-nik qaffanneqarpata pisortat aningaasartuutaat 550.000 kr.-nik qaffakkumaarlutik.

Ataasiaannartumik taarsigassarsiat 1.000 kr.-nik qaffanneqarnerat pisortat aningaasartuutaasa 220.000 kr.-nik qaffanneqarnerannik nassataqassaaq aammalu 2.000 kr.-nik qaffaneq pisortat aningaasartuutaasa 440.000 kr.-nik qaffannerannik kinguneqassalluni.

Taarsigassarsiat qaammatikkuutaartumik tuniunneqartalernerat ukiup affakkuutaartumik tunniussisarnermit allaffissornikkut sunniuteqassaaq. Naatsorsuutiginnilarput allannguutit annertuujussasut, tassami ilinniagaqarnerisutit qaammatikkuutaartumik tunniunneqartarnerat ingerlareermat.

Namminersorlutik inuussutissarsiortunut aningaasatigut allaffissornikkullu qanoq sunniuteqassava?

Ilimanangilaq Inatsisartut aalajangiinerat aningaasatigut allaffissornikkullu sunniuteqarumaartoq.

Innuttaasunut ataasiakkaanut aningaasatigut allaffissornikkullu qanoq sunniuteqassava?

Ilinniagaqartunut amerlanerusunik taarsigassarsisinnaanermik atuiniartunut taarsersuutit amerlanerulernerannik kinguneqassaaq.